



Ina grappa da medis svizzers va cun 36 probands a China sin il Muztagh-Ata.

KEYSTONE

# Perscrutaziun svizra sin 7000 meters

## Medis svizzers van l'onn proxim cun 36 probands a China

■ (anr/vi) Proxima stad datti ina da las pli grondas expediziuns da perscrutaziun svizra dals ultims decennis. Ina grappa da medis va cun 36 probands a China sin il Muztagh-Ata. Il culm ha ina autezza da 7546 meters.

Durant l'expediziun, che cuzza in mais, vegn perscrutà mals d'autezza. Ils fenomens dal corp che sa manifesteschan tar alpinists che surpassan autezzas «normalas» èn enconuschents, ma els n'èn strusch perscrutads.

### Disturbis dal tscharvè e dals eglis

In team da perscrutaders che sa fatschenta gia daditg cun mals d'autezza vul uss intercurir ils mecanissem dal corp en las autezzas. Ina dumonda è: Funcziuna il tscharvè en las autezzas main bain sulet pervi da la mancanza d'oxigen u gogan ils strapatschs corpo-

rals e mentalis ina pli gronda rolla? Sclerir lessan ils perscrutaders era, sche turas extremas pon chaschunar donns (Funktionseinbussen) dal tscharvè che restan per adina. Examinads vegnan plinavant disturbis da durmir u dals eglis en autezzas extremas.

### Nagut per alpinists ambizius

Per l'expediziun dovri 36 probands ch'èn prontos da schar far examinaziuns avant, durant e sunter l'expediziun. Ils probands ston esser bain trenads ed alpinists cumprovads. Els ston pajar sezs ils custs dad 8000 francs. Sch'ìls custs vegnan reducids tras contribuziuns da sponsurs, n'è anc betg ditg.

Persunter pon ils probands profitar d'ina scolaziun en dumondas medicinalas d'autezza durant l'expediziun.

Pli impurtant che da cuntanscher il piz dal Muztagh-Ata è il project da perscrutaziun, la collegialitad ed il team, pon ins leger sin la pagina d'internet d'expediziun. Ina garanzia da cuntanscher il piz na vegn dà nagina. Ma ins emprova da cuntanscher cun uschè blers participants sco pussaivel il piz.

### Medis e guid da muntogna

L'expediziun vegn manada da *Tobias Merz* ed *Urs Hefli* che han gia il 2001 realisà ina expediziun en il Tibet. *Marco Maggiorini* e *Konrad Bloch* dal spital d'universitad a Turitg èn responsabels per la perscrutaziun. Plirs medis da Berna ed Aarau cumpletteschon il team. Il guid da muntogna *Kari Kobler* maina la part tecnica ed alpinistica.

[www.swiss-exped.ch](http://www.swiss-exped.ch)